

SKUPŠTINA KANTONA SARAJEVO

**ZAPISNIK SA
12. RADNE SJEDNICE SKUPŠTINE KANTONA SARAJEVO,
ODRŽANE 29.02.2016. GODINE SA POČETKOM RADA U 10,00 SATI**

Sarajevo, FEBRUAR 2016.

Sjednici su prisustvovali poslanici/zastupnici:

STRANKA DEMOKRATSKE AKCIJE

1. Ademović Kemal
2. Čelik Mirza
3. Čomor Eldar
4. Delalić Sabahudin
5. Dovadžija Amar
6. Kozadra Muhamed
7. Mašović Amor
8. Mešanović Safet
9. Okerić Elmedin
10. Prevljak Fikret

DEMOKRATSKA FRONTA – ŽELJKO KOMŠIĆ

1. Akšamija Goran
2. Avdibegović Neira
3. Bukva Sejo
4. Kerla Bibija
5. Mehmedagić Mersiha
6. Pindžo Mirsad
7. Vukasović Mario

SAVEZ ZA BOLJU BUDUĆNOST – FAHRUDIN RADONČIĆ

1. Babić Ana
2. Bajrović Izudin
3. Filipović Selma
4. Lakota Rasim
5. Pecikoza Fahrudin
6. Marić Zvonko
7. Rađo Dževad

SOCIJALDEMOKRATSKA PARTIJA BOSNE I HERCEGOVINE

1. Srna Bajramović Srna
2. Šućur Slaviša

NAŠA STRANKA

1. Čudić Sabina
2. Forto Edin
3. Kojović Predrag

BOSANSKA STRANKA – MIRNES AJANOVIĆ

1. Pleho Haris
2. Rasim Smajić

BOSANSKOHERCEGOVAČKA PATRIOTSKA STRANKA – SEFER HALILOVIĆ

1. Halilović Semir

SAMOSTALNI POSLANICI/ZASTUPNICI

1. Bjelak Nermin
2. Aljović Hamed
3. Mekić Amel

TOK SJEDNICE

12. Radnu sjednicu Skupštine Kantona Sarajevo 29. februara 2016.godine u 10,00 sati, otvorila je predsjedateljica Ana Babić.

Prema evidenciji Službe sjednici su na otvaranju prisustvovala 32 poslanika/zastupnika, što je dovoljan broj za punovažan rad i odlučivanje, a kašnjenje na sjednicu najavili su poslanici/zastupnici: Amel Mekić i Slaviša Šućur.

UTVRĐIVANJE DNEVNOG REDA

Prijedlog dnevnog reda 12. Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 17.02.2016.godine.

Na osnovu člana 73. Poslovnika Skupštine Kantona Sarajevo, Kolegij Skupštine Kantona Sarajevo, prihvatio je prijedlog Vlade Kantona Sarajevo i Komisije za izbor i imenovanja i administrativna pitanja da se Prijedlog dnevnog reda 12. Radne sjednice, dopuni sa sljedećim tačkama:

1. Prijedlog odluke o izmjeni Odluke o imenovanju predsjednika, zamjenika predsjednika i članova Odbora za javna priznanja Kantona Sarajevo; (Razmatraće se kao 7. tačka)
2. Prijedlog odluke o davanju ovlaštenja za obavljanje funkcije sekretara Skupštine; (Razmatraće se kao 8. tačka)
3. Prijedlog odluke o izmjeni odluke o imenovanju Nezavisnog odbora za izbor i reviziju policijskog komesara; (Razmatraće se kao 9. tačka)
4. Prijedlog odluke o visini naknade članova Nezavisnog odbora; (Razmatraće se kao 10. tačka)
5. Prijedlog odluke o izmjeni Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo. (Razmatraće se kao 11. tačka)
6. Prijedlog odluke o davanju saglasnosti na Program rada Kantonalnog stambenog fonda Sarajevo za 2016. godinu. (Razmatraće se kao 12. tačka)
7. Prijedlog odluke o davanju saglasnosti na dopunjeni Finansijski plan prihoda i rashoda za 2016. godinu Kantonalnog stambenog fonda Sarajevo; (Razmatraće se kao 13. tačka)
8. Prijedlog odluke o davanju saglasnosti na Odluku o izmjenama i dopunama Statuta Javne ustanove Psihijatrijska bolnica Kantona Sarajevo; (Razmatraće se kao 14. tačka)
9.
 - a. Prijedlog rješenja o razrješenju Upravnog odbora Kantonalne agencije za privatizaciju Sarajevo; (Razmatraće se kao 15a.tačka)
 - b. Prijedlog rješenja o privremenom imenovanju Upravnog odbora Kantonalne agencije za privatizaciju Sarajevo; (Razmatraće se kao 15b.tačka)

10. Izvještaj o poslovanju JU "Kantonalni centar za socijalni rad" za 2014. godinu (Izvještaj o radu sa Izvještajem o finansijskom poslovanju za 2014. godinu) sa prilogima; (Razmatraće se kao 17. tačka)
11. Izvještaj o poslovanju KJU Dom za djecu bez roditeljskog staranja za 2014. godinu (Izvještaj o radu sa Izvještajem o finansijskom poslovanju za 2014. godinu) sa prilogima; (Razmatraće se kao 18. tačka)
12. Izvještaj o stanju u oblasti socijalne zaštite, zaštite civilnih žrtava rata i zaštite porodice sa djecom u 2015. godini; (Razmatraće se kao 19.tačka)

Predsjedateljica je predložila sljedeći Dnevni red na izjašnjavanje:

1. Poslanička/zastupnička pitanja, inicijative i odgovori;
2. Prijedlog zakona o izmjenama i dopunama Zakona o geološkim istraživanjima-skraćeni postupak;
3. Prijedlog zakona o plaćama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo;
4. Prijedlozi odluka o davanju saglasnosti na Program rada sa finansijskim planom:
 - a) Javne ustanove Narodno pozorište, Sarajevo za 2016. godinu;
 - b) Javne ustanove Sarajevska filharmonija za 2016. godinu;
 - c) Javne ustanove Pozorište mladih Sarajevo za 2016. godinu;
 - d) Javne ustanove Kamerni teatar '55 Sarajevo za 2016. godinu;
 - e) Javne ustanove Sarajevski ratni teatar- SARTR za 2016. godinu;
 - f) Javne ustanove MES – Međunarodni teatarski festival – Scena MESS za 2016. godinu;
 - g) Javne ustanove Kantonalni zavod za zaštitu kulturno-historijskog i prirodnog naslijeđa Sarajeva za 2016. godinu;
 - h) Javne ustanove Historijski arhiv Sarajevo za 2016. godinu;
 - i) Javne ustanove Biblioteka Sarajeva za 2016. godinu;
 - j) Javne ustanove Muzej „Alija Izetbegović“, Sarajevo za 2016. godinu;
5. Prijedlog odluke o davanju saglasnosti Zavodu za izgradnju Kantona Sarajevo za prenos prava raspolaganja nad zemljištem;
6. Prijedlog odluke o davanju saglasnosti na Program rada sa finansijskim planom Fonda Kantona Sarajevo za stipendiranje i školovanje djece boraca, poginulih boraca i poginulih civila – žrtava rata "IKRE" za 2016. godinu;
7. Prijedlog odluke o izmjeni Odluke o imenovanju predsjednika, zamjenika predsjednika i članova Odbora za javna priznanja Kantona Sarajevo;
8. Prijedlog odluke o davanju ovlaštenja za obavljanje funkcije sekretara Skupštine;
9. Prijedlog odluke o izmjeni odluke o imenovanju Nezavisnog odbora za izbor i reviziju policijskog komesara;
10. Prijedlog odluke o visini naknade članova Nezavisnog odbora;
11. Prijedlog odluke o izmjeni Odluke o izboru predsjedavajućih, zamjenika predsjedavajućih i članova stalnih radnih tijela Skupštine Kantona Sarajevo.
12. Prijedlog odluke o davanju saglasnosti na Program rada Kantonalnog stambenog fonda Sarajevo za 2016. godinu.
13. Prijedlog odluke o davanju saglasnosti na dopunjeni Finansijski plan prihoda i rashoda za 2016. godinu Kantonalnog stambenog fonda Sarajevo;
14. Prijedlog odluke o davanju saglasnosti na Odluku o izmjenama i dopunama Statuta Javne ustanove Psihijatrijska bolnica Kantona Sarajevo;
- 15.

- a) Prijedlog rješenja o razrješenju Upravnog odbora Kantonalne agencije za privatizaciju Sarajevo;
 - b) Prijedlog rješenja o privremenom imenovanju Upravnog odbora Kantonalne agencije za privatizaciju Sarajevo;
16. Izvještaj o radu Kantonalnog tužilaštva Kantona Sarajevo za 2015. godinu.
 17. Izvještaj o poslovanju JU "Kantonalni centar za socijalni rad" za 2014. godinu (Izvještaj o radu sa Izvještajem o finansijskom poslovanju za 2014. godinu) sa prilogima;
 18. Izvještaj o poslovanju KJU Dom za djecu bez roditeljskog staranja za 2014. godinu (Izvještaj o radu sa Izvještajem o finansijskom poslovanju za 2014. godinu) sa prilogima;
 19. Izvještaj o stanju u oblasti socijalne zaštite, zaštite civilnih žrtava rata i zaštite porodice sa djecom u 2015. godini.

Usljedila je diskusija po predloženom dnevnom redu u kojoj su učestvovali zastupnici: Segmedina Srna Bajramović, Zvonko Marić, Mirza Čelik, Semir Halilović, Mirsad Pindžo i Muhamed Kozadra i premijer Elmedin Konaković.

Sve primjedbe su se uglavnom odnosile na vrijeme dostavljanja dopunskog materijala i količinu tačaka u istom.

Nakon diskusije predsjedateljica je pozvala još jednom zastupnike da se izjasne o predloženom Dnevnom redu.

Dnevni red 12. Radne sjednice usvojen je u predloženoj formi većinom glasova (29 „ZA“).

Predsjedateljica je navela da su zastupnicima dostavljeni sljedeći informativni materijali:

- a. Izvještaj o utrošku sredstava Tekuće rezerve iz Budžeta kantona Sarajevo za 2015. godinu;
- b. Informacija o stanju kriminaliteta, javnog reda i mira i sigurnosti saobraćaja na području Kantona Sarajevo za mjesec januar 2016. godine.

Prije prelaska na realizaciju prve tačke dnevnog reda zastupnici su razmatrali Zapisnik sa Stenogramom sa Desete radne sjednice Skupštine Kantona Sarajevo. Kako nije bilo primjedbi na iste, odmah se pristupilo izjašnjanju.

Zapisnik sa Desete radne sjednice Skupštine Kantona Sarajevo održane 01.02.2016.godine je usvojen jednoglasno (33 „ZA“).

U 11,10 sati se prešlo na realizaciju prve tačke dnevnog reda.

AD – 1.

POSLANIČKA/ ZASTUPNIČKA PITANJA I INICIJATIVE

Predsjedateljica je davala riječ prijavljenim zastupnicima po abecednom redu.

Zastupnik Hamed Aljović je postavio dva zastupnička pitanja:

„Moje prvo pitanje upućeno je prema ministrici zdravstva Kantona Sarajevo. Molim ministricu zdravstva da mi odgovori zašto je u periodu 01.01.2007 do 31.03.2015 godine broj zaposlenih u JU Domovi zdravlja Kantona Sarajevo povećan za 323 uposlenika, a posebno zašto je povećan broj administrativno tehničkog i ostalih radnika. Kao i doktora stomatologa. Da li je zapošljavanje izvršeno po pozitivnim zakonskim propisima?

Moje drugo pitanje upućeno je prema Zavodu za izgradnju Kantona Sarajevo. Na 9. radnoj sjednici Skupština Kantona Sarajevo održanoj 21.12.2015.godine u okviru tačke dnevnog reda zastupnička pitanja postavio sam pitanje prema Zavodu za izgradnju Kantona Sarajevo. Na isto sam dobio odgovor sa kojim apsolutno nisam zadovoljan, čak su mi pogrešno napisali ime i prezime. Ponovo postavljam pitanje prema Zavodu za izgradnju Kantona Sarajevo. Molim Zavod za izgradnju Kantona Sarajevo da mi dostavi imena i prezimena svih osoba koji koriste stanove koji su upisani u knjigovodstvene i finansijske knjige Zavoda, kao i pravni osnov za to, uključujući i stanove Zavoda koji su dati na čuvanje Ministarstvu za boračka pitanja Kantona Sarajevo, Upravi za inspekcijske poslove Kantona Sarajevo, Stručnoj službi Vlade Kantona Sarajevo, Ministarstvu za stambene poslove Kantona Sarajevo i Ministarstvu za ljudska prava i izbjeglice BiH“.

Zastupnik Neira Avdibegović je uputila dvije zastupnička inicijative:

„Ja za danas imam dvije zastupničke inicijative. Moja prva zastupnička inicijativa je upućena Ministarstvu saobraćaja Kantona Sarajevo. A odnosi se na prostor ispred Pozorišta mladih Sarajevo, koji je pretvoren u parking.

Svjedoci smo da je u posljednjih par mjeseci repertoar Pozorišta mladih izuzetno bogat i da su predstave, kako za djecu, tako i za odrasle, mahom rasprodate. Za vrijeme novogodišnjih praznika, u Pozorištu je uz prigodan program upriličena i podjela paketića za naše najmlađe sugrađane. Nažalost, sveukupan dojam narušava neuređen prilaz samom Pozorištu, parkirani automobili otežavaju kretanje posjetiocima, a nerijetko se dogodi da se i mališani povrijede.

Svjesna činjenice da gradu nedostaje parking prostor koji bi zadovoljio parking potrebe velikog broja registrovanih automobila, smatram da je apsolutno nedopustivo da se plato ispred Pozorišta mladih, u samom centru našeg grada, gdje se ostvaruje prvi kontakt i rađa ljubav prema umjetnosti, pozorištu, kulturi, koristi kao parking, umjesto da se uredi kao svojevrsan trg sa klupama, možda fontanom, sadržajima za djecu i roditelje, pa i bistama velikih glumačkih imena koje je ova profesija izrodila, a sto bi ujedno poučno djelovalo na djecu i omladinu.

Stoga pokrećem inicijativu da resorno ministarstvo izmjesti parking sa platoa ispred pozorišta, te da se u narednom periodu ovaj prostor uredi, kako bi svi građani, prvenstveno djeca i mladi, imali priliku uživati u posjetama Pozorištu.

Moja druga zastupnička inicijativa je ustvari zastupničko pitanje, upućeno Vladi Kantona Sarajevo, a odnosi se na obavezu plaćanja administrativnih taksi za nezaposlene osobe:

Nakon informacija koje sam dobila od naših sugrađana, a potom i lično provela malo istraživanje, došla sam do saznanja da se Zakon o administrativnim taksama Kantona Sarajevo različito tumači u praksi, kako u pojedinim opštinama, tako i u službama unutar iste opštine, kada je u pitanju naplata taksi nezaposlenim osobama.

Naime, Zakonom je utvrđena obaveza plaćanja administrativnih taksi za spise i radnje kod organa uprave i pravnih lica koja imaju ovlaštenja, kao i lična i predmetna oslobađanja od plaćanja taksi.

U članu 8. Zakona je definisano koje kategorije su oslobođene plaćanja taksi. Nažalost, ovim članom nisu obuhvaćene nezaposlene osobe, koje su, primjerice, u skladu sa tarifnim brojem 19. Zakona, za izdavanje rješenja kojim se odobrava pokretanje obrta, dužne platiti takse u iznosu od čak 80 KM.

S obzirom da u Zakonu stoji da su takse prihod Kantona, nisam upoznata sa postojanjem eventualne dodatne regulative iz ove oblasti, pa molim Vladu za pojašnjenje, kako bi se izbjeglo proizvoljno tumačenje Zakona. Ukoliko su navedene informacije tačne, molim da ovo pitanje tretirate kao zastupničku inicijativu za izmjenom čl. 8. Zakona o administrativnim taksama, koji će obuhvatiti i nezaposlene osobe, koje uz odgovarajuću potvrdu sa biroa trebaju biti oslobođene plaćanja takse“.

Zastupnik Mirza Čelik je uputio jednu zastupničku inicijativu:

„Ja imam jednu kratku inicijativu. U skladu sa Poslovníkom Skupštine podnosim inicijativu. Tražim od Vlade Kantona Sarajevo da pokrene postupak raskida ugovora koji je štetan za Kanton Sarajevo a odnosi se na zakup stanova na području naselja Otes, Općina Ilidža sa firmom GPA društvo za razvoj i stanogradnju doo Sarajevo. Obrazloženje: obzirom da je 09.04.2014 godine traženo izjašnjenje od gore navede firme za kupovinu tih zgrada a da se GPA do sada nije izjasnila do danas, tražim od Vlade Kantona da preispita štetnost i da pokrene proceduru za raskid ugovora.“

Zastupnik Edin Forto je uputio jednu inicijativu i postavio jedno zastupničko pitanje:

„ Ja imam jednu inicijativu za Ministarstvo saobraćaja. Inicijativu ću dostaviti pismeno pa se nadam da možemo dobiti i pismeni odgovor na ovu inicijativu. Po uzoru na normalne europske gradove, turističke destinacije mislimo da bi bilo normalno da ovo Ministarstvo izradi tačnije da pokrene izradu informativnih panoa koji bi se postavili na svim stajalištima gradskog prijevoza. Ovi panoi bi trebali između ostalog imati četiri elementa: jedan je da bi to trebala biti mapa sa šematskim prikazom svih gradskih linija uključujući trolejbus, tramvaj, bus i minibus. Panoi bi trebali imati označene istorijske, administrativne, obrazovne i zdravstvene institucije. Zatim, ovi panoi bi morali imati aktuelne redove vožnje, i detaljne informacije o cijenama gradskog prijevoza. Molim da ovo pismeno dobijem odgovor, jer mnogim ljudima i turistima ali i građanima je nevjerovatno da mi ovo već nemamo.

Drugo pitanje imam prema Ministarstvu komunalne privede. Bilo bi dobro ako bi ministar mogao odmah danas da odgovori jer je ovo vrlo jedno kratko i jednostavno pitanje. Na osnovu člana 167 Zakona o vodama, Skupština Kantona na prijedlog Vlade donosi petogodišnji plan upravljanja vodama. Zakon je donešen 2010 godine a rok za usvajanje petogodišnjeg plana je dvije godine. Moje pitanje prema ministru je da li je ovaj petogodišnji plan o upravljanju vodama donesen? „

Zastupnik Bibija Kerla je uputila dvije zastupničke inicijative:

„S obzirom da se ne osjećam danas baš najbolje, ne bih da hitna dolazi ponovo ovdje u Skupštinu, ja ću svoja pitanja i inicijative koja se tiču zaštite socijalno ugroženih građana Kantona Sarajevo što je veoma veliki broj izražen, dostaviti pismeno. A isto tako moju inicijativu što hitnije obezbjeđenje pružnih tokova u opštini Ilijaš“.

Zastupnik Predrag Kojović je postavio jedno zastupničko pitanje:

„Moje je pitanje upućeno MUP-u. Sastoji se iz nekako dva dijela. Ja pretpostavljam da je ministar, potpuno sam siguran, vidio u medijima naš sugrađanin i zemljak, dokazani Bosanac i Hercegovac Tin Klensi je opisao svoje iskustvo koje je imao kada je želio da prijavi krađu šume i privatne imovine policijskoj stanici i vjerujem da ste mnogi upoznati kako je taj razgovor sa službenikom koji se javio u operativnom centru na broj 122 tekao, ali ono što sam ja htio posebno da istaknem ovdje jer odgovore koje je dobio Tin Klensi očigledno ukazuju na jednu duboku sistemsko nerazumijevanje policije o tome šta je njihov posao. Jer kada vi nazovete policiju da prijavite da neko susjedu, komšiji ili javno dobro krade a oni vam kažu da vi niste nadležni da zovete, nego neka zove taj čije je to što se krade itd. onda očigledno da policija ima sistemski pogrešno razumijevanje o tome šta je njihov posao. A ono što pokazuje nedvosmisleno da policija zapravo ne zna koja je njena uloga je sljedeća stvar. Kada je naš sugrađanin Klensi pitao da se policajka s kojom razgovara predstavi, odnosno da se identifikuje ona je to odbila. Ja naravno moram priznati da se i meni dogodio jedan sličan takav slučaj kada sam tražio jednog policajca jer sam smatrao da je napravio grešku, želio sam da ga prijavim, što sam i uradio, da se identifikuje, on je to odbio. Prema tome mene zanima jedno konkretno pitanje od ministra mada ono sam potpuno uvjeren da znam odgovor, ali bih volio da on to na neki javni način on to reafirmiše ovdje za govornicom je sljedeće: kada građanin priđe policajcu i zatraži da se policajac identifikuje. Policajac se naravno može identifikovati imenom i prezimenom ili službenim brojem. Ja razumijem potrebu da se ljudi ne identifikuju lično. Ali to je java funkcija, on se mora identifikovati brojem. Želio bih da ministar potvrdi da policajci imaju obavezu da se predstave građanima, da se identifikuju. I da ako postoji neka potreba da se uputi neka vrsta depeše da se policajci podsjetite na to. Također bih volio da mi kaže također ako ima neko mišljenje ili stav o tom razgovoru koji je tekao iz policijske stanice, odnosno da li mi kada vidimo da recimo neko krade stan pljačka stan našeg komšije, da li mi možemo nazvati policijsku stanicu ili to samo može učiniti komšija koji nije tu i zato mu pljačkaju stan.“

Zastupnik Mersiha Mehmedagić je postavilo jedno zastupničko pitanje:

„Ja imam zastupničko pitanje i upućujem ga Ministarstvu privrede Kantona Sarajevo. Želim podsjetiti da još uvijek nisam dobila odgovor na zastupničko pitanje postavljeno 07.10.2015.godine a koje glasi: Koje konkretne mjere su poduzete ili se planiraju poduzeti kako bi se obezbijedila decidna primjena ugovora o koncesiji i unaprijedili mehanizmi naplate koncesione naknade. U sklopu odgovora sam tražila detaljnu informaciju o stanju u oblasti rudarstva i eksploatacije prirodnih resursa na području Kantona Sarajevo sa osvrtom na stanje obaveza i potraživanja po osnovu eksploatacije mineralnih sirovina i geoloških istraživanja. Pošto je Vlada predložila Zakon o izmjenama i dopunama Zakona o geološkom istraživanju i to u skraćenom postupku, prethodno pitanje dopunjujem i sljedećim: koje je stanje obaveza i uplata po osnovu Odluke o plaćanju naknada za geološka istraživanja na dan 31.12.2015.godine i koliko je bilo slučajeva detaljnog geološkog istraživanja u svrhu navedenu u članu 8 stav 4 zakona bez odobrenja nadležnog ministarstva. Obrazloženje je sljedeće:

Novim prijedlogom Zakona o izmjenama i dopunama Zakona o geološkim istraživanjima bi se po mom mišljenju mogla dodatno pogoršati naplata naknade za geološko istraživanje, a proces dodjele odobrenja učiniti još netransparentnijim. Odlukom Vlade o plaćanju naknade za istraživanje i eksploataciju mineralnih sirovina od 23.04.2002.godine definirana je koncesijska naknada za eksploataciju mineralnih sirovina prilikom obavljanja istražnih radnji. Visina naknade nikada nije regulisana odlukom već je predmetom pregovaranja prilikom dodjele ugovora o koncesiji što je prilično netransparentno. Ugovorom je definirano da korisnik koncesije vrši kvartalne akontativne uplate dok se konačan obračun vrši na osnovu godišnjih geodetskih snimaka sačinjenih od strane ovlaštenog privrednog društva koje o svom

trošku osigurava korisnik koncesije. Predloženim izmjenama obračun bi mogao izvršiti i drugi subjekt a ne samo ovlašteno privredno društvo i javna ustanova što može dovesti u pitanje pouzdanost i samog obračuna a samim tim i umanjenje i onako skromnih prihoda po ovom osnovu. Uloga ministarstva je da uz pomoć uprave za inspekcijske poslove osigura dosljednu primjenu važećih zakona iz ove oblasti i osigura da svaki korisnik plati naknadu, adekvatnu naknadu, a ne da kao inženjering firma općinama vodi katastar istražnih prostora. I na kraju i revizija finansijskih izvještaja Budžeta Kantona Sarajevo za 2014 godinu je pokazala loše upravljanje koncesijama, netransparentnost ugovaranja. Ne postojanje ugovora i nizak stepen naplate koncesione naknade, pa bi Ministarstvo trebalo slijediti preporuke Ureda za reviziju institucija FBIH i ako je to potrebno kao što je premijer naglasio, mijenjati Zakon u redovnoj proceduri a ne po skraćenom postupku kako je to danas i navedeno. „

Zastupnik Elvedin Okerić je uputio jednu zastupničku inicijativu:

„Inicijativa se odnosi na Ministarstvo za boračka pitanja. Inicijativa za finansiranje izgradnje spomen obilježja prvoj uniformisanoj žrtvi grada Sarajeva Samir Mišić. Želim vas prije svega informisati o historijskom događaju koji se desio 05.04.1992 kada je agresor izvršio napad na Centar za obrazovanje policijskih kadrova MUP-a. Tog dana u opsežnoj operaciji agresora i višesatnog branjenja škole od strane učenika i profesora poginuo je učenik Samir Mišić. Samir Mišić je posthumno dobitnik najvećeg ratnog priznanja, Zlatne policijske značke u znak priznanja za hrabrost i lični primjer ispoljen u oružanim borbama. Dio dokumentarnog filma Krvavi ples po šeheru snimljen u produkciji Udruženja za zaštitu istorijskih vrijednosti BIH Haber, autora Avde Huseinovića govori o prvom napadu i prvoj herojskoj žrtvi Grad Sarajevo o rahmetli Samiru Mišiću. Samir Mišić imao je 16 godina, bio je polaznik 20.te klase Policijske škole na Vracama kada su ga 05.04.1992.godine ubile agresorske snage tokom napada. Na 35. sjednici održanoj 24.02.2016. Gradsko vijeće Grada Sarajevo donijelo je odluku o postavljanju spomenika, spomen ploče Samiru Mišiću, kao spomen obilježje od značaja za Grad Sarajevo u krugu policijske akademije na Vracama. Također federalni MUP je ranije dalo svoju saglasnost za izgradnju istog. Prema raspoloživim informacijama inicijatori će nastojati da izgrade spomen obilježje do ovogodišnje godišnjice koja je planirana uz najveće policijske počasti da se organizira 05.04. očekuje se podrška Općine u ovom projektu ali obzirom da nadležnost nad boračkom populacijom je na većim nivoima vlasti, stoga predlažemo da naš Kanton, u skladu sa mogućnostima pomogne ovaj značaj projekat, kako za Kanton tako i za državu BIH. Klub SDA u Skupština Kantona Sarajevo upućuje inicijativu za finansiranje izgradnje spomen obilježja Samiru Mišiću u krugu Policijske akademije na Vracama a čiji su troškovi izgradnje procijenjeni oko 5000 KM. Postoji već idejno rješenje i predračun radova koje vam u prilogu dostavljam.“

Zastupnik Zvonko Marić je uputio dvije zastupničke inicijative:

„Dakle ja imam dvije inicijative. Prva se odnosi prije svega na pokretanje inicijative da se sazove tematska sjednica koja je vezana za vodozaštitnu zonu na Ilidži. Jedan vrlo ozbiljan problem. Mislim da nije potpuno posvećena dovoljno pažnje tom gorućem problemu, zaista je alarmantno. Trebalo je slušati na tematskoj sjednici Općinskog vijeća šta se zapravo sve dešava. Slična sjednica je održana ovdje i 2010 godine, međutim od tada se ništa nije pomjerilo s mrtve tačke već su stvari zakomplicirane. Mislim da građani Ilidže podsjećaju zapravo i kompletna Ilidža na svojevrstni rekao bih ogromni čardak ni na nebu ni na zemlji, iz više razloga. Vodozaštitna zona koja je u četiri pojasa je ugrožena i mislim da je zagađila sva izvorišta. Možemo mi pričati šta hoćemo ali imam i neke podatke koji se odnose na ispravnost vode za piće. Hlorom možete uništiti sve bakterije, znate dozirate malo jače a onda neću govoriti o štetnosti hlora. Ali šta je sa teškim metalima i hiljadu drugih stvari. Šta mi zapravo ostavljamo generacijama koje dolaze od onog bogatstva koje je BIH odnosno glavni grad Sarajevo imalo od tih izvorišta sa kojih se napaja skoro cijeli grad. Žao mi je što nisu bili neki

predstavnicu Vlade na toj sjednici, ali evo gospodin Forto je bio koliko se sjećam, gospodin Čelik i ministar Kazazović, ali ću vam reći da je potpuno ignorirana ta tematska sjednica koja je zapravo jedan očajnički vapaj ljudi da se napokon stane u kraj onome šta se dešava tamo. I zagađuje se i okoliš i sva četiri pojasa vodozaštitne zone, a sve je vezano za federalni Zakon posebice za članak 68 koji je vrlo upitan. Stoga može Vlada sasvim sigurno puno da učini i naravno Skupština Kantona i da uputi svoje sugestije vezano za taj Zakon jer on je u proceduri koliko znam. Na stranu priča o 10 000 bespravno izgrađenih objekata taj proces i dalje traje. 10 000 septičkih jama, jel vi mislite da te septičke jame nisu ugrozile i da kažem da se taj proces bespravne gradnje nastavlja i dalje. Ti ljudi su kao taoci. Oni su zapravo kao taoci zato što im se u predizbornim kampanjama govori o tome ako dođu neki drugi na vlast srušit će vam te objekte koje ste bespravno izgradili. Da se prestane sa takvom praksom i da se otvore ta pitanja koja su zaista goruća i teške posljedice možemo očekivati i šta mi možemo na kraju krajeva učiniti da uradimo vezano za to i da se poboljša takvo stanje? Zaista je alarmantno stanje i stoga zahtjeva reakciju i to promptnu svih nadležnih i da se pokaže da ta općina ako je geografski granična da nije na margini brige kantonalnih vlasti.

Druga stvar, vrlo kratka inicijativa ili pitanje za Ministarstvo saobraćaja. Molim vas, rubni ili padinski dijelovi su bez prijevoza. Djeca odlaze i navečer kada je mrak, evo Jarčedole, reći ću vam jedno naselje u nizu tih naselja koji nemaju prijevoz. Po tom osnovu je primjetna segregacija ili nesposobnost organa odnosno upravljačkih struktura Grasa da organiziraju prevoz za tu djecu. Psi lutilice hodaju. Ta neizvjesnost, ta strepnja roditelja zaista ne može se ničim opisati. A da ne govorim o zaposlenicima koji rade sa tih područja. Dakle, ili dajte jednu vrstu ravnopravnosti i organizirajte prevoz da ljudi imaju neku sigurnost.“

Zastupnik Dževad Rado je izjavio nezadovoljstvo zbog nedobijenog odgovora na postavljeno pitanje i postavio novo zastupničko pitanje:

„Prvo želim da kažem sljedeće da nisam dobio odgovor na pitanje koje sam postavio na radnoj sjednici Skupština Kantona Sarajevo 21.12.2015.godine. Prema Poslovniku Skupština Kantona Sarajevo odgovor na postavljeno pitanje zastupnicima trebaju da se odgovore najkasnije u roku od 30 dana. Ovim putem izražavam svoj krajnje nezadovoljstvo i naravno i dalje insistiram na dobijanju odgovora u pisanoj formi.

Imam jedno zastupničko pitanje. A odnosi se na sljedeće:

Sindikata radnika trgovine i uslužnih djelatnosti Sindikalna podružnica KJP „ZOI 84“ Sarajevo, uputila mi je molbu da reagujem i postavim pitanje koje svakodnevno postavljaju radnici kompanije a ne dobivaju odgovore, te pitam sljedeće :

Šta je sa Statutom firme koji je po mišljenju radnika donesen nelegalno, te na taj način je uspostavljena i Uprava kompanije ?

Status provođenja sanacionog plana i programa kompanije koji je donesen od strane Skupštine Kantona Sarajevo nije ispoštovan, koliko su radnici upoznati, ispoštovan je samo segment uplate zaostalih plaća i toplih obroka.

Šta je sa radnim mjestima, kako dolazi do zapostavljanja stručnosti i radnog iskustva pod okriljem sistematizacije radnih mjesta. Konstantno smjenjivanje „starog“ stručnog kadra i dovođenje novog nestručnog kadra ?

Ko je odgovoran za sanaciju piste za brzo klizanje ? Radovi koji su imali za cilj sanaciju same piste kao i magacinskih prostora u gorem su stanju nego prije sanacije.

Traži se odgovornost za urušavanje voznog parka i stanja vertikalnog transporta (tri motora za pokretanje liftova su uništena zbog nemara pojedinaca koji nisu sankcionisani).

Pitanja iz radnog odnosa nisu regulisana (zakonsko uporište donošenja odluka o minimalnoj plaći, dinamika isplate zaostalih plaća i toplih obroka, realizacija administrativnih zabrana na platama radnika po osnovu kredita, obustavljanje obračuna sindikalne članarine bez pristanka radnika).

Nadamo se da će gore navedna pitanja pokrenuti pozitivne procese u kompaniji te ista spriječiti propadanje „ZOI 84“. Naravno tražim odgovor u pisanoj formi.“

Zastupnik Rasim Smajić je postavio dva zastupnička pitanja:

„Moje zastupničko pitanje bit će upućeno premijeru, gđinu Elmedinu Konakoviću a odnosi se na konkurs koji je izašao prije nekih pet mjeseci, Zavod za zapošljavanje Kantona Sarajevo objavio je konkurs za sufinansiranje zaposlenja, prvih zaposlenja i tzv. odrađivanje pripravničkog staža. Znači, pet mjeseci je prošlo, pet mjeseci 600 mladih ljudi čeka na prvo zaposlenje u Kantonu Sarajevo. Ništa se desilo nije. Znači konkurs je izašao, bio, vjerovatno će dočekati i drugi konkurs za 2016, ovo se odnosi na konkurs u 2015 godini. Tako da bih zamolio premijera da nam objasni šta se dešava, o čemu se radi, zašto se taj konkurs nije riješio do sada jer je u međuvremenu izašao i konkurs na federalnom nivou pa nastao je totali haos među ljudima i među poslodavcima koji trebaju da apliciraju na ta dva konkursa. Napominjem da federalni konkurs izašao nekih 20- tak dana prošle godine prije kantonalnog konkursa i on je davno završen i ti ljudi odavno rade, dok konkurs Kantonalne ustanove Sarajevo još nikad nije završen. Da vidimo šta, o čemu se radi u čemu je problem sa tim konkursom.

Moje drugo zastupničko pitanje bit će ponovo upućeno ministru za prostorno uređenje gđinu Čedomiru Lukiću. Čini mi se gđine Lukiću da ste mi na prošloj sjednici obećali da ćete mi dostaviti predmet I13. niste ga dostavili ni u kopiji ni u kakvom primjerku ni elektronskom ni pisanom. Ja ga neću čitati gđine Čedomire Lukiću, ja ću ga direktno prosljediti Tužilaštvu jer znam o čemu se radi. „

Zastupnik Segmedina Srna Bajramović je podnijela zastupničku inicijativu i postavila pitanje:

„Ja danas u skladu sa članom 72. Poslovnika Skupštine podnosim inicijativu da se za narednu sjednicu Skupštine uvrsti tačka dnevnog reda Informacija o saznanjima poduzetim aktivnostima odnosno mjerama nadležnih tijela po pitanju slučaja trovanja djece u JU Djeca Sarajeva.

Obrazloženje:

Uzimajući u obzir činjenicu da već mjesecima ne dobijamo odgovor od strane nadležnih kada je u pitanju navedeni slučaj, te da su istekli svi poslovníkom prema članu 219 predviđeni rokovi, smatram kako su se stekli svi uslovi da navedena problematika bude delegirana kao tačka dnevnog reda na narednoj sjednici Skupština Kantona Sarajevo. S obzirom da smo danima bili izloženi spektakularnim najavama o utvrđivanju odgovornosti po pitanju navedenog slučaja do dana današnjeg nismo dobili niti jednu konkretnu i relevantnu informaciju po tom pitanju. Ne želim vjerovati kako je tadašnja, možemo je nazvati hajka, bila usmjerena samo s političkim ciljem oslobađanja jedne direktorske fotelje, jer je činjenica kako se nakon ostavke direktorice apsolutno sve u procesu i sistemu utvrđivanja odgovornosti usmjerava ka potpunoj šutnji administracije. Prije svega, naša zajednička odgovornost je da utvrdimo relevantne činjenice kako se navedeni slučaj više nikada ne bi ponovio, te stoga očekujem da na sjednici Skupštine razmotrimo materijal i saznanja do kojih se došlo putem nadležnih tijela Vlade Kantona Sarajevo, potpuno sam svjesna da je i Tužilaštvo jedan od instituta koji u ovom slučaju ima svoju možda i ključnu ulogu te navedenu informaciju moguće nadopuniti i njihovim saznanjima ukoliko to naravno ne predstavlja smetnju za sami slučaj. Na kraju smatram kako je previše vremena prošlo a da nemamo niti jedan zvaničan stav. Informaciju. Te stoga očekujem da će kolege zastupnici podržati ovu inicijativu koja ima samo jednu namjeru a to je utvrđivanje istine u interesu prije svega, zdravlja djece pa na kraju i svih drugih zainteresovanih koji su u ovom slučaju mjesecima predmet raznih špekulacija

spram nivoa odgovornosti. Dakle, zamolit ću vas da se Skupština izjasni o ovoj mojoj inicijativi, pošto sam navela kako su se stekli uvjeti.

Ja sam imala pripremljeno još jedno pitanje, s obzirom da smo mjesecima u javnosti bili svjedoci kontradiktornih izjava različitih formalnih autoriteta a vezanih za potencijalno snižavanje cijena grijanja uslijed smanjenja veleprodajne cijene plina. Dakle, pošto sam dobila najbrži odgovor može li, premijer nam je već u uvodnom obraćanju našem najavio, spomenuo da je Vlada jutros na svojoj sjednici donijela odluku o smanjenju cijene plina, može li nam premijer malo pojasniti to smanjenje u smislu efekata od 01.01. i hoće li se trend nastaviti ukoliko se ostvari današnja najava ministra Džindića, federalnog ministra o novih 7%. S obzirom da je cijena pala 15% a građani dobili 7% sniženja onda je za očekivati da se na ovih 7% u potpunosti prelije na smanjenje troškova građana. Ja ću samo podsjetiti da je prema Džindićevim riječima njegov zahtjev za dodatno sniženje cijene plina opravda i realan te će u narednim danima biti poslan NO ove državne firme na razmatranje.“

Predsjedateljica je zamolila zastupnicu Segmedinu Srnu Bajramović da inicijativu umnoži kako bi se ista podijelila zastupnicima koji će se izjašnjavati.

Zastupnik Mario Vukasović je naglasio da je svoja dva zastupnička pitanja dostavio Službi za skupštinske poslove u pismenoj formi.

Predsjedateljica Ana Babić je također u pismenoj formi podnijela zastupničku inicijativu.

Zastupnik Amel Mekić je postavio zastupničko pitanje:

„Pitanje za gđina ministra Hasanspahića. Ovo nedozvoljeno plaketiranje po nepredviđenim mjestima po gradu stvarno predstavljaju ruglo, kako u predizbornim kampanjama tako i u održavanju raznih koncerata i ostalih manifestacija. Ako naiđemo evo ulicom Koševo vidjet ćemo da su svi zidovi koji nisu predviđeni za plaketiranje oblijepljeni, stubovi, vrata i sve ostalo. Mislim da bi se ljudi koji vrše prekršaje, odnosno organizatori tih manifestacija trebali rigoroznije kazniti jer na žalost naš grad zbog takvih ljudi koji nisu svjesni u dosta prljaju i naš grad ne čine jednom metropolom kakvom Sarajevo treba da bude. „

Dio odgovora na postavljena pitanja dali su ministar unutrašnjih poslova, Ismir Jusko i premijer Elmedin Konaković.

Nakon iznošenja zastupničkih pitanja i inicijativa, predsjedateljica Ana Babić je dala na glasanje inicijativu zastupnice Segmedine Srne Bajramović koja se odnosi na saznanja i poduzete mjere nadležnih tijela po pitanju slučaja trovanja djece u JU Djeca.

Inicijativa je usvojena jednoglasno (33 „ZA“).

Prešlo se na razradu druge tačke dnevnog reda.

AD – 2.

NACRT ZAKONA O IZMJENAMA I DOPUNAMA ZAKONA O GEOLOŠKIM ISTRAŽIVANJIMA

Predsjedateljica je napomenula prisutne da je u materijalima ova tačka dostavljena kao „Prijedlog Zakona o izmjenama i dopunama Zakona o geološkim istraživanjima“, skraćeni postupak, međutim Vlada je prihvatila sugestije i prijedlog Zakona pretvorila u Nacrt. Ministar privrede, Muharem Šabić je podnio uvodno izlaganje.

Zastupnici nisu postavili pitanja a u diskusiji su učestovali: Slaviša Šućur, Segmedina Srna Bajramović i Eldar Čomor.

Jednoglasno (29 „ZA“) su doneseni sljedeći Zaključci:

- 1. Utvrđuje se Nacrt zakona o izmjenama i dopunama Zakona o geološkim istraživanjima;*
- 2. Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće 30 dana.*
- 3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.*
- 4. Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o izmjenama i dopunama Zakona o geološkim istraživanjima.*

Prešlo se na razmatranje treće tačke:

AD – 3.

PRIJEDLOG ZAKONA O PLAĆAMA I NAKNADAMA ČLANOVA ORGANA UPRAVLJANJA I DRUGIH ORGANA INSTITUCIJA KANTONA SARAJEVO, KANTONALNIH JAVNIH PREDUZEĆA I JAVNIH USTANOVA ČIJI JE OSNIVAČ KANTON Sarajevo

Zastupnici su Prijedlog zakona dobili uz poziv za sjednicu. Amandmane zastupnika Hameda Aljovića i Kluba Demokratske fronte po ovom Prijedlogu su dostavljeni u dopunskom materijalu.

Ministar pravde i uprave, Mario Nenadić, podnio je uvodne napomene i izjasnio se u ime Predlagača o podnesenim amandmanima.

Pitanja su postavili zastupnici: Slaviša Šućur, Semir Halilović, Muhamed Kozadra, Zvonko Marić, Rasim Lakota.

Odgovore na postavljena pitanja je dao ministar Mario Nenadić.

Predsjedateljica je potom otvorila diskusiju u kojoj su učestvovali zastupnici: Mirsad Pindžo, Semir Halilović, Slaviša Šućur i Zvonko Marić, nakon čega su premijer Elmedin Konaković i ministar Mario Nenadić dali još neka pojašnjenja na pitanja koja su proizašla iz diskusije zastupnika.

Kako je Vlada Kantona Sarajevo prihvatila sve amandmane Kluba zastupnika Demokratske fronte o istima se nije izjašnjavalo.

Zastupnik Hamed Aljović je ostao pri svom Amandmanu, koji glasi:

AMANDMAN I

„Da se u članu 11, stav (1) iza riječi: „Federalnog zavoda za statistiku“ doda: „, zarez, osim javnih ustanova članica Univerziteta u Sarajevu koje ostvaruju vlastite prihode, realizirajući posebne projekte i programe“.

Nakon glasanja, predsjedavajuća je konstatovala da Amandman nije usvojen (8 „ZA“).

Zatim se pristupilo izjašnjanju o Prijedlogu zakona.

SKUPŠTINA JE VEĆINOM GLASOVA (33 „ZA“) DONIJELA ZAKON O PLAĆAMA I NAKNADAMA ČLANOVA ORGANA UPRAVLJANJA I DRUGIH ORGANA INSTITUCIJA KANTONA SARAJEVO, KANTONALNIH JAVNIH PREDUZEĆA I JAVNIH USTANOVA ČIJI JE OSNIVAČ KANTON SARAJEVO.

Četvrta tačka dnevnog reda:

AD – 4.

PRIJEDLOZI ODLUKA O DAVANJU SUGLASNOSTI NA PROGRAM RADA SA FINANSIJSKIM PLANOM:

- a) Javne ustanove Narodno pozorište, Sarajevo za 2016. godinu;
- b) Javne ustanove Sarajevska filharmonija za 2016. godinu;
- c) Javne ustanove Pozorište mladih Sarajevo za 2016. godinu;
- d) Javne ustanove Kamerni teatar '55 Sarajevo za 2016. godinu;
- e) Javne ustanove Sarajevski ratni teatar- SARTR za 2016. godinu;
- f) Javne ustanove MES – Međunarodni teatarski festival – Scena MESS za 2016. godinu;
- g) Javne ustanove Kantonalni zavod za zaštitu kulturno-historijskog i prirodnog naslijeđa Sarajeva za 2016. godinu;
- h) Javne ustanove Historijski arhiv Sarajevo za 2016. godinu;
- i) Javne ustanove Biblioteka Sarajeva za 2016. godinu;
- j) Javne ustanove Muzej „Alija Izetbegović“, Sarajevo za 2016. godinu

Zastupnici su prijedloge odluka dobili uz poziv za sjednicu.

Predsjedateljica je predložila, obzirom da se radi o subjektima iz oblasti kulture, da se provede jedinstvena rasprava po ovim odlukama, a izjašnjanje pojedinačno, što su zastupnici jednoglasno i podržali.

Uvodno izlaganje je podnio ministar kulture i sporta Mirvad Kurić.

Nije bilo prijavljenih zastupnika za pitanja, a u diskusiji su učestvovali zastupnici: Mersiha Mehmedagić, Sabina Ćudić, Semir Halilović, Muhamed Kozadra, Izudin Bajrović i Neira Avdibegović.

Predsjedateljica je zaključila diskusiju nakon čega su se prisutnima obratili ministar Mirvad Kurić i premijer Elmedin Konaković.

Nakon ovih obraćanja, predsjedateljica je pozvala zastupnike na posebno izjašnjanje po svakoj javnoj ustanovi.

a)
SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE NARODNO POZORIŠTE SARAJEVO ZA 2016. GODINU.

b)
SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE SARAJEVSKA FILHARMONIJA ZA 2016. GODINU.

c)
SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE POZORIŠTE MLADIH SARAJEVO ZA 2016. GODINU

d)
SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE KAMERNI TEATAR '55 SARAJEVO ZA 2016. GODINU

e)
SKUPŠTINA JE VEĆINOM GLASOVA (31 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE SARAJEVSKI RATNI TEATAR - SARTR ZA 2016. GODINU.

f)
SKUPŠTINA JE VEĆINOM GLASOVA (31 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE MES - MEĐUNARODNI TEATARSKI FESTIVAL - SCENA MESS

g)
SKUPŠTINA JE VEĆINOM GLASOVA (31 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE KANTONALNI ZAVOD ZA ZAŠTITU KULTURNO-HISTORIJSKOG I PRIRODNOG NASLIJEĐA SARAJEVO ZA 2016. GODINU.

h)
SKUPŠTINA JE VEĆINOM GLASOVA (31 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE HISTORIJSKI ARHIV SARAJEVO ZA 2016. GODINU

i)

SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE BIBLIOTEKA SARAJEVA ZA 2016. GODINU

j)

SKUPŠTINA JE VEĆINOM GLASOVA (32 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM JAVNE USTANOVE MUZEJ „ALIJA IZETBEGOVIĆ“ ZA 2016. GODINU.

Predsjedateljica se zahvalila gostima te zaključila ovu tačku dnevnog reda i prešlo se na razradu pete tačke dnevnog reda.

AD – 5.

PRIJEDLOG ODLUKE O DAVANJU SAGLASNOSTI ZAVODU ZA IZGRADNJU KANTONA SARAJEVO ZA PRENOS PRAVA RASPOLAGANJA NAD ZEMLJIŠTEM

Zastupnici su Prijedlog odluke dobili uz poziv za sjednicu, a Amandman predlagača Mirze Čelika, te mišljenje Vlade Kantona Sarajevo u dopunskom materijalu.

Uvodne napomene kao Predlagač je podnio zastupnik Mirza Čelik.

Pitanja za predlagača nije bilo, a u diskusiji su učestovali zastupnici: Segmedina Srna Bajramović, Slaviša Šućur.

Odgovore su dali zastupnik Mirza Čelik i premijer Elmedin Konaković.

Predsjedateljica je pozvala prisutne da se izjasne i konstatovala je da je:

SKUPŠTINA VEĆINOM GLASOVA (24 „ZA“) DONIJELA ODLUKU DAVANJU SAGLASNOSTI ZAVODU ZA IZGRADNJU KANTONA SARAJEVO ZA PRENOS PRAVA RASPOLAGANJA NAD ZEMLJIŠTEM.

U 14,00 predsjedateljica je dala pauzu za ručak u trajanju od jednog sata.

NASTAVAK NAKON PAUZE

Prije prelaska na narednu tačku dnevnog reda predsjedateljica je informisala zastupnike da je danas formiran Klub zastupnica Skupštine Kantona Sarajevo čiji je naredni korak da formalizuju izmjene Poslovnika, kako bi se Klub formalizovao, te stekao sva prava predviđena Poslovníkom.

AD – 6.

PRIJEDLOG ODLUKE O DAVANJU SAGLASNOSTI NA PROGRAM RADA SA FINANSIJSKIM PLANOM FONDA KANTONA SARAJEVO ZA STIPENDIRANJE I ŠKOLOVANJE DJECE BORACA, POGINULIH BORACA I POGINULIH CIVILA – ŽRTAVA RATA "IKRE" ZA 2016. GODINU

Zastupnici su Prijedlog odluke dobili uz poziv za sjednicu te su smatrali da nema potrebe za uvodnim izlaganjem predlagača. Nije bilo pitanja, a u diskusiji je učestvovala zastupnica Mersiha Mehmedagić.

SKUPŠTINE JE VEĆINOM GLASOVA (24 „ZA“) DONIJELA ODLUKU O DAVANJU SAGLASNOSTI NA PROGRAM RADA SA FINANSIJSKIM PLANOM FONDA KANTONA SARAJEVO ZA STIPENDIRANJE I ŠKOLOVANJE DJECE BORACA, POGINULIH BORACA I POGINULIH CIVILA – ŽRTAVA RATA "IKRE" ZA 2016. GODINU.

Sedma tačka dnevnog reda:

AD – 7.

PRIJEDLOG ODLUKE O IZMJENI ODLUKE O IMENOVANJU PREDSJEDNIKA, ZAMJENIKA PREDSJEDNIKA I ČLANOVA ODBORA ZA JAVNA PRIZNANJA KANTONA SARAJEVO

Prijedlog odluke su zastupnici dobili u dopunskom materijalu. Zastupnik Kemal Ademović, predsjedavajući Komisije za izbor, imenovanja i administrativna pitanja je podnio uvodna izlaganja.

Nije bilo postavljenih pitanja niti diskusije.

SKUPŠTINA JE VEĆINOM GLASOVA (26 „ZA“) DONIJELA ODLUKU O O IZMJENI ODLUKE O IMENOVANJU PREDSJEDNIKA, ZAMJENIKA PREDSJEDNIKA I ČLANOVA ODBORA ZA JAVNA PRIZNANJA KANTONA SARAJEVO.

AD – 8.

PRIJEDLOG ODLUKE O DAVANJU OVLAŠTENJA ZA OBAVLJANJE FUNKCIJE SEKRETARA SKUPŠTINE

Zastupnici su Prijedlog odluke dobili u dopunskom materijalu. U ime Komisije za izbor, imenovanje i administrativna pitanja uvodno izlaganje je podnio predsjednik Komisije Kemal Ademović. Nije bilo prijavljenih za pitanja ili diskusiju.

SKUPŠTINA JE VEĆINOM GLASOVA (26 „ZA“) DONIJELA ODLUKU O DAVANJU OVLAŠTENJA ZA OBAVLJANJE FUNKCIJE SEKRETARA SKUPŠTINE

AD – 9.

PRIJEDLOG ODLUKE O IZMJENI ODLUKE O IMENOVANJU NEZAVISNOG ODBORA ZA IZBOR I REVIZIJU POLICIJSKOG KOMESARA

Zastupnici su Prijedlog odluke dobili u dopunskom materijalu. U ime Komisije za izbor, imenovanje i administrativna pitanja uvodno izlaganje je podnio predsjednik Komisije Kemal Ademović. Nije bilo prijavljenih za pitanja ili diskusiju.

SKUPŠTINA JE VEĆINOM GLASOVA (26 „ZA“) DONIJELA ODLUKU O IZMJENI ODLUKE O IMENOVANJU NEZAVISNOG ODBORA ZA IZBOR I REVIZIJU POLICIJSKOG KOMESARA.

AD – 10.

PRIJEDLOG ODLUKE O VISINI NAKNADE ČLANOVA NEZAVISNOG

Zastupnici su Prijedlog odluke dobili u dopunskom materijalu. U ime Komisije za izbor, imenovanje i administrativna pitanja uvodno izlaganje je podnio predsjednik Komisije Kemal Ademović. Nije bilo prijavljenih za pitanja ili diskusiju.

SKUPŠTINA JE VEĆINOM GLASOVA (26 „ZA“) DONIJELA ODLUKU O VISINI NAKNADE ČLANOVA NEZAVISNOG ODBORA.

Jedanaesta tačka:

AD – 11.

PRIJEDLOG ODLUKE O IZMJENI ODLUKE O IZBORU PREDSEDAVAJUĆIH, ZAMJENIKA PREDSEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO

Zastupnici su Prijedlog odluke dobili u dopunskom materijalu. U ime Komisije za izbor, imenovanje i administrativna pitanja uvodno izlaganje je podnio predsjednik Komisije Kemal Ademović. Nije bilo prijavljenih za pitanja ili diskusiju.

SKUPŠTINA JE VEĆINOM GLASOVA (26 „ZA“) DONIJELA ODLUKU O IZMJENI ODLUKE O IZBORU PREDSEDAVAJUĆIH, ZAMJENIKA PREDSEDAVAJUĆIH I ČLANOVA STALNIH RADNIH TIJELA SKUPŠTINE KANTONA SARAJEVO.

Dvanaesta tačka dnevnog reda:

AD – 12.

PRIJEDLOG ODLUKE O DAVANJU SAGLASNOSTI NA PROGRAM RADA KANTONALNOG STAMBENOG FONDA SARAJEVO ZA 2016. GODINU

Zastupnici su Prijedlog odluke dobili u dopunskom materijalu. Uvodno izlaganje je podnio ministar prostornog uređenja, građenja i zaštite okoliša Čedomir Lukić. Nije bilo prijavljenih za pitanja ili diskusiju.

SKUPŠTINA JE VEĆINOM GLASOVA (26 „ZA“) DONIJELA ODLUKU O DAVANJU SAGLASNOSTI NA PROGRAM RADA KANTONALNOG STAMBENOG FONDA SARAJEVO ZA 2016. GODINU.

Trinaesta tačka dnevnog reda:

AD – 13.

PRIJEDLOG ODLUKE O DAVANJU SAGLASNOSTI NA DOPUNJENI FINANSIJSKI PLAN PRIHODA I RASHODA ZA 2016. GODINU KANTONALNOG STAMBENOG FONDA SARAJEVO

Zastupnici su Prijedlog odluke dobili u dopunskom materijalu.

Uvodno izlaganje je podnio ministar prostornog uređenja, građenja i zaštite okoliša Čedomir Lukić.

Nije bilo prijavljenih za pitanja, a u diskusiji je učestvovao zastupnik Mirsad Pindžo. Nakon izjašnjavanja zastupnika, predsjedateljica je konstatovala da Prijedlog nije dobio potrebu većinu na što su zastupnici izjavili sumnju u glasanje.

Sekretar Skupštine po ovlaštenju, Almira Kulovac Šetkić je provela prozivku zastupnika, nakon čega je predsjedateljica konstatovala:

SKUPŠTINA JE VEĆINOM GLASOVA (18 „ZA“) DONIJELA ODLUKU O DAVANJU SAGLASNOSTI NA DOPUNJENI FINANSIJSKI PLAN PRIHODA I RASHODA ZA 2016. GODINU KANTONALNOG STAMBENOG FONDA SARAJEVO

Četrnaesta tačka dnevnog reda:

AD – 14.

PRIJEDLOG ODLUKE O DAVANJU SAGLASNOSTI NA ODLUKU O IZMJENAMA I DOPUNAMA STATUTA JAVNE USTANOVE PSIHIJATRIJSKA BOLNICA KANTONA SARAJEVO

Zastupnici su Prijedlog odluke dobili u dopunskom materijalu. U ime predlagача obratila se ministrica zdravstva Zilha Ademaj.

U ime Komisije za zaštitu javnog zdravlja i svoje lično ime obratio se zastupnik Goran Akšamija postavljajući nekoliko pitanja ministrici Ademaj.

Nakon što se ministrica Zilha Ademaj dala odgovore na postavljena pitanja, nije bilo više prijavljenih za pitanja ili diskusiju te je predsjedateljica pozvala prisutne na izjašnjavanje.

SKUPŠTINA JE VEĆINOM GLASOVA (22 „ZA“) DONIJELA ODLUKU O DAVANJU SAGLASNOSTI NA ODLUKU O IZMJENAMA I DOPUNAMA STATUTA JAVNE USTANOVE PSIHIJATRIJSKA BOLNICA KANTONA SARAJEVO.

Petnaesta tačka dnevnog reda:

15.

- a) **PRIJEDLOG RJEŠENJA O RAZRJEŠENJU UPRAVNOG ODBORA KANTONALNE AGENCIJE ZA PRIVATIZACIJU SARAJEVO**

b) PRIJEDLOG RJEŠENJA O PRIVREMENOM IMENOVANJU UPRAVNOG ODBORA KANTONALNE AGENCIJE ZA PRIVATIZACIJU SARAJEVO

Zastupnici su Prijedloge rješenja dobili u dopunskom materijalu. Jednoglasno su podržali prijedlog predsjedateljice da se vodi jedinstvena rasprava o prijedlozima rješenja a izjašnjavanje pojedinačno.

Po mišljenju zastupnika nije bilo potrebe za uvodnim izlaganjem, niti je bilo prijavljenih za pitanja ili diskusiju, te je predsjedateljica pozvala na izjašnjavanje.

a)

SKUPŠTINA JE VEĆINOM GLASOVA („ZA“ 27) DONIJELA RJEŠENJE O RAZRJEŠENJU UPRAVNOG ODBORA KANTONALNE AGENCIJE ZA PRIVATIZACIJU SARAJEVO

b)

SKUPŠTINA JE VEĆINOM GLASOVA („ZA“ 19) DONIJELA RJEŠENJE O IMENOVANJU UPRAVNOG ODBORA KANTONALNE AGENCIJE ZA PRIVATIZACIJU SARAJEVO

Šesnaesta tačka dnevnog reda:

AD – 16.

IZVJEŠTAJ O RADU KANTONALNOG TUŽILAŠTVA KANTONA SARAJEVO ZA 2015. GODINU

Na prijedlog određenih zastupnika, predsjedateljica je zamolila da se izjasne da li će se sjednica prekinuti zbog ranije preuzetih obaveza i dugog trajanja sjednice. Glasanjem je potvrđen nastavak rada na sjednici.

Uvodno izlaganje je podnijela glavna kantonalna tužiteljica Dalila Burzić.

Pitanja su postavili zastupnici: Bibija Kerla, Mirsad Pindžo, Zvonko Marić, Semir Halilović, Elvedin Okerić, Fahridin Pecikoza, Amel Mekić, na što je glavna kantonalna tužiteljica dala iscrpne odgovore.

Dodatna pitanja postavio je zastupnik Amel Mekić dok su zastupnici: Zvonko Marić, Predrag Kojović dali replike na odgovor tužiteljice. Nezadovoljstvo odgovorom iskazao je zastupnik Mirsad Pindžo.

Na insistiranje zastupnice Segmedine Srne Bajramović predsjedateljica je zaključila replike i otvorila diskusiju u kojoj su učestvovali zastupnici: Semir Halilović, Segmedina Srna Bajramović, Mirsad Pindžo, Zvonko Marić i Bibija Kerla.

Glavna kantonalna tužiteljica Dalila Burzić je dala pojašnjenja na pitanja koja su proizašla iz diskusije zastupnika.

SKUPŠTINA JE VEĆINOM GLASOVA (28 „ZA“) USVOJILA IZVJEŠTAJ O RADU KANTONALNOG TUŽILAŠTVA KANTONA SARAJEVO ZA 2015. GODINU

Sedamnaesta tačka dnevnog reda:

AD - 17.

**IZVJEŠTAJ O POSLOVANJU JU "KANTONALNI CENTAR ZA SOCIJALNI RAD" ZA 2014. GODINU
(IZVJEŠTAJ O RADU SA IZVJEŠTAJEM O FINANSIJSKOM POSLOVANJU ZA 2014. GODINU) SA PRILOZIMA**

Zastupnici su izvještaje dobili u dopunskom materijalu.

Ministrica za rad, socijalnu politiku, raseljena lica i izbjeglice Amela Dautbegović podnijela je uvodno izlaganje.

Pitanje je postavila zastupnica Segmedina Srna Bajramović na što je ministrica Dautbegović dala kratak odgovor.

U diskusiji koja je potom otvorena učestovavao je zastupnik Haris Pleho.

Obzirom da nije bilo više prijavljenih zastupnika za diskusiju, predsjedateljica je pozvala na izjašnjavaње.

SKUPŠTINE NIJE USVOJILA (19 „protiv“) IZVJEŠTAJ O POSLOVANJU JU "KANTONALNI CENTAR ZA SOCIJALNI RAD" ZA 2014.

Osamnaesta tačka dnevnog reda:

AD – 18.

**IZVJEŠTAJ O POSLOVANJU KJU DOM ZA DJECU BEZ RODITELJSKOG STARANJA ZA 2014. GODINU
(IZVJEŠTAJ O RADU SA IZVJEŠTAJEM O FINANSIJSKOM POSLOVANJU ZA 2014. GODINU) SA PRILOZIMA**

Izvještaj su zastupnici dobili dopunskom materijalu. Zastupnici su smatrali da nema potrebe za uvodnim izlaganjem. Pitanje je uputila zastupnica Segmedina Srna Bajramović na što je ministrica Amela Dautbegović dala odgovor.

Ministrica Amela Dautbegović je pozvala direktora JU Dom za djecu bez roditeljskog staranja da se obrati i da odgovore na neka pitanja.

Prisutnima se obratio Saudin Đurđić, direktor JU Dom za djecu bez roditeljskog staranja.

Pitanja imenovanom direktoru postavili su zastupnici: Izudin Bajrović i zastupnik kojeg predsjedateljica nije predstavila u mikrofon. Direktor je dao odgovore.

U diskusiji koja je potom uslijedila, učestvovala je zastupnica Segmedina Srna Bajramović.

**SKUPŠTINA NIJE USVOJILA (24 „PROTIV“) IZVJEŠTAJ O POSLOVANJU KJU
DOM ZA DJECU BEZ RODITELJSKOG STARANJA ZA 2014. GODINU**

Devetnaesta tačka dnevnog reda:

AD – 19.

**IZVJEŠTAJ O STANJU U OBLASTI SOCIJALNE ZAŠTITE, ZAŠTITE CIVILNIH
ŽRTAVA RATA I ZAŠTITE PORODICE SA DJECOM U 2015. GODINI**

Izvještaj su zastupnici dobili u dopunskom materijalu. Uvodno izlaganje u ime predlagača je podnijela ministrica za Ministrica rad, socijalnu politiku, raseljena lica i izbjeglice Amela Dautbegović.

Nije bilo prijavljenih za pitanja ili diskusiju te je predsjedateljica zaključila diskusiju i pozvala zastupnike na izjašnjanje.

**SKUPŠTINA JE USVOJILA (20 „ZA“) IZVJEŠTAJ O STANJU U OBLASTI
SOCIJALNE ZAŠTITE, ZAŠTITE CIVILNIH ŽRTAVA RATA I ZAŠTITE
PORODICE SA DJECOM U 2015. GODINI.**

Predsjedateljica je zaključila sjednicu u 18,31 sati.

Zapisnik izradila:

Lejla Kadrić

Po ovlaštenju

SEKRETAR

SKUPŠTINE KANTONA SARAJEVO

Almira Kulovac Šetkić, dipl. pravnik

PREDSJEDATELJICA

SKUPŠTINE KANTONA SARAJEVO

Prof. Ana Babić

